

濯

纓

亭

筆

記

濯纓亭筆記卷四

長洲戴冠章甫

芙蓉花曝乾置竈上則樟木蟲自死

蟲赤翅白項而臭專

生竈上

飯糝能腐青石猫糞能腐錫

龍生九子不成龍今器物之飾皆其遺像云蒲牢好鳴今鍾上獸紐囚牛好音樂今胡琴頭上刻獸睚眦好殺今刀柄上龍吞頭狻猊好坐今佛座獅子負屭好文今石碑兩旁龍虬螭好負

重今碑下石獸狴犴好訟今獄門上獅子頭蚩
吻好吞今殿脊獸頭嘲風好險今殿角上走獸
此相傳之說未知出何書漫識之

韓退之平淮西碑視段文昌所作不啻蘇合與
蜣蜋之丸耳向令李愬少知文義猶欲垂名於
韓子之文而不願易矣况初未嘗沒其功乎文
昌無恥承詔不讓而爲之自後世識者視之何
如哉然予觀韓碑叙事有云皇帝歷問于朝一
二臣外皆曰蔡帥之不廷授今五十年因撫而

有順且無事以至大官臆決唱聲萬口和附牢
不可破皆言羣臣不欲伐蔡之意意者當時庸
劣失言之徒讀愈此文而內愧陰嗾嬖妻入訴
未可知也世事之衆楚一齊多類此可勝歎

哉歎

元楊髡發宋諸陵事倪端叟游杭雜藁云在歲
戊寅十二月周公謹癸辛雜識則云在至元二
十二年乙酉八月又云事起於天長寺僧聞成
於演福寺僧澤中官陵使羅銑者守陵不去與
之極力爭辨爲澤痛箠脅以刃令人逐去大哭

而出宋景濂書穆陵遺骸則云至元二十一年
甲申僧嗣古妙高上言欲毀宋會稽諸陵江南
總攝楊璉真伽與丞相桑哥相表裏爲姦明年
乙酉奏請如二僧言云云按戊寅乃至元十五
年明年宋亡世祖始混一天下若甲申乙酉則
宋亡已六七年守陵之官亦遯去不在矣必丙
子之後或端宗方立或帝昺航海之時妖髡乘
亂而爲此或嗣古妙高嘗獻邪謀於南北未一
之日欲使潛發宋陵以泄其氣而世祖從之爾

大抵此事當在至元十五年者近是宋公所書必仍野史之誤也南村輟耕錄亦云至元丙子天兵下江南至乙酉將十載版圖已定法制已明安得有一事戊寅距丙子不三年竊恐此時庶事草創而妖髡得以肆其惡斯言得之矣

秦崇山東單縣人爲應天府尹民有婦從外夫而亡爲其夫所得執詣崇崇杖殺之是日崇見婦來曰我罪不至死何爲殺我崇呼左右逐之無所見崇尋病暴死沈福者浙之德清人知眉

州嘗獲賊婦七人福命曳諸市身自衣緋泣刑
呼伍伯用大杖擊其首而斃福尋疽發背死二
人皆輕視人命淫刑以逞其死也謂非天

道乎

吳節眉州人景泰甲戌進士歷知岳州府岳有
盜亡命其婦坐繫有娠當免身節命於獄戶外
設簞箔蔽風使蓐媪視之已而婦以產難死節
出俸資命獄吏買棺付其家人瘞之後岳州江
中盜起勢甚猖獗藩臬以聞于朝詔命府衛
合兵討之兵甲犀利士卒精悍自謂賊不足滅

不意陷入賊伏中悉爲所戕無脫者賊中一人忽大呼曰恩主吳太守安在已而登舟見節叩頭自言姓名則前瘞婦之夫也親護節登陸舟中之人皆得全節後仕至都御史嗚呼節之加恩賊婦亦古罪人不孥之意初無心於望報也特以一念之仁終陷危而獲濟豈可謂非天道哉然以盜之不道猶知感恩而不忘報如此莫強於人心而可以仁結詎不信夫用甕盛人糞埋之背陰處土中久則化爲清水

取出可塗瘡瘍

治痢疾方薑四錢竹刀刮去皮切碎如白痢不

去皮茶四錢去梗水二鍾砂銚煎六分服之

癰藥方海桐皮川槿樹皮各等分剉碎用汲器

下滴無根水浸半日先以麻布擦瘡微損乃用

布裹藥擦患處以瘡去爲度

蝦蟇大而黃色者最治小兒疳積去皮去首用

鹽塗之白酒浸少頃置新瓦上微火炙熟與兒

食之神效

食羊肉過飽食栗子一兩枚即消食瓜傷多食鹽少許食蟹中毒飲紫蘇湯解之

造海石法取苦瓜萆搗碎連汁用煨過蛤粉和勻作餅曝乾入藥最去痰蓋鹹能軟堅蛤生海中得鹹性多而瓜萆性又去痰者故用之相和則攻去凝結之痰易於取效若以海浮石爲海石非是或云自有真海石非人造者惟御藥房有之

被虎傷者啖菜油一兩盪爲佳食諸禽獸惡死

肉者亦宜服此

吳俗以十月初五日爲五風生日太湖漁者千餘家盛陳牲醴饗並湖諸神祠祈此日有風則每五日風雨如期而至終歲皆然可以揚帆取魚謂之五風信

王華江西建昌人爲浙江按察僉事弘治丙辰六月行部如溫州途中有大蛇隨舟而行舟人驅之不去蛇昂首若欲登舟者王衣冠起坐船頭祝曰吾奉朝廷命出巡此土蛇何爲者欲作

孽耶蛇俯首逝去至郡入分司則蛇已先在蟠
於中庭王使隸卒擊逐之忽不見王意殊怪之
夜坐寢室聞有聲拉然蛇自梁間墜下王驚呼
左右俄失蛇所在自是得疾神志瞋亂旬日遂
殂或云王一歲前嘗夢人告之曰我章容也當
與公同去王寤以語人亦莫測所以比在溫公
廨前有樟榕樹大可數抱蓋三四百年物以二
木交生故名一日樹忽無故而仆吏入白曰樟
榕倒矣王已病殆聞之憮然少選遂氣絕

沈洪濟烏程人有姊入官爲女官洪濟登鄉薦
小錄進御其姊見洪濟之名作詩寄之曰一自
承恩入帝畿難將寸草答春暉朝隨御輦趨青
瑣夕奉綸音侍禁闈銀燭燒殘空有淚玉釵敲
斷恨無歸年來喜子登金榜同補山龍上衮衣
一時多傳誦之

郡邑城隍之神當用木主今爲土木之偶被以
衣冠又求一人以實之且立後殿設像爲夫人
世俗可笑事大率類此附城之邑令長初涖任

祭祀或旱潦祈禱皆當就郡祠行禮今往往別立祠亦非也紹興府城隍神初設土偶嘗爲太守白玉撤去後有通判于某貪鄙無識乃復設像更立六曹若郡邑官府之制其年朝覲幸不黜免遂自謂神庇後竟以賄敗而土偶至今承譌莫有能去之者

會稽山神祠建自隋開皇十四年累代加封王爵本朝止稱南鎮會稽山之神予分教紹興日嘗陪祀至祠下其地兩山分脉自南而北兩

水夾流至祠下而合祠南面山山巔香爐一峯
正對祠門其正殿中有石筍一枝高可丈許後
人從其上加土爲衣冠之像聞故老云石筍疑
有所長土像項下時迸裂歲加脩葺旣而復然
郡守嶺南彭公誼命塑工設像多空其中乃得
不壞彭公固賢守有方略惜其未明鬼神之情
狀耳蓋石筍乃山之靈氣所鍾故前人於其處
建祠今妄加土偶祇以瀆之又建後殿設夫人
像不知當以何山爲婦而作配乎考之洪武禮

制祭社稷儀式云神牌二以木爲之至嶽鎮海
濱帝王陵廟下則云其牲物祭器儀注並與社
稷同此其當設主而不爲像貌亦明矣我高
皇帝釐正祀典實萬世所當遵守有民社者於
此類宜亟正之不可安於陋習而不反諸

經也

正統間有譚禧者爲紹興府推官會脩廟學禧
見大成殿材皆良木乃以他木易之作器又鑄
新銅爵易古爵後禧罷官過大庾嶺爲盜所殺
人以爲聖人之靈陰加譴罰也予曰禧爲人好

賄既挾厚貲慢藏誨盜故取殺身之禍聖人在天之靈固無不在豈若是之屑屑耶然亦足以爲貪昧無禮者之戒矣

成化丁未自六月不雨至於八月溪港皆不通舟楫先是嘉興諸邑船尾率畫鋤鑿之屬不約而同莫知所起意者水道枯涸藉此器以疏濬此其兆之先見者歟

成化間嘉善縣民八鄒亮妻初乳生三子再乳生四子三乳生六子俱不育

以死鼠投溺中浸將腐埋於橘樹根下則橘大茂

鷄冠花子以手播於地則開時花萼如指以扇播於地則花萼如扇生瓜收種時以刀直剖而取其子則明年瓜狹而長橫剖而取其子則瓜圓而短又如一種甜瓜名金香合瓜圓而匾其色黃故名若收種時刮去皮明年種之則瓜色正白名銀香合又種芝麻者必著草履赤腳種之則生莢甚稀其理皆不可曉

哥窯瓷器破碎已離者用極薄開化紙篩下細石灰入鷄子青和勻與損處相粘著候乾用湯煮一過置之閒處三五日則如故矣

天順丁丑山陰儒士羅周聞御史沈性將薦之爲河間府學訓導周於正月三日扶箕召仙問事之成否箕忽書云風雷不改舊山河華屋年深蔓綠蘿仙掌雲銷金氣冷鳳臺人去月明多英雄早聽青銅吼感慨誰知白石歌回首五湖烟水闊且將閒興託漁簑詩首句言國家事其

後大抵言富貴易於銷歇論周以不必仕也是年英廟復辟改元天順而周事竟不成國事之變更前程之通塞鬼神已前知矣

唐明皇遊月宮事其妄誕固無足辨所記者亦各不同異聞錄則曰申天師唐逸史則曰羅公遠集異錄則曰葉法善蓋明皇崇信神怪嘗自云聞空中神語以欺罔臣下言之不忤則其下安得不競爲迂誕之說以相眩惑哉夫以明皇之身三綱俱絕借使月中信有宮宇可遊亦詎

容其滓穢乎

宋太祖改元乾德聞竇儀言蜀少主嘗有此號
因歎曰宰相須用讀書人然宰相之讀書與否
其所關繫大矣豈特改元一事哉余因考我

朝國號年號偶同於古之稱謂者如左 宋孝

武帝改元大明 梁天監九年行大明曆 北

齊神武於晉陽城中置大明宮建大明殿 唐

有大明宮賈至王維諸人並賦早朝大明宮詩

元有大明殿 漢桓帝母孝崇區皇后靈帝

母孝仁董皇后宮皆曰永樂 後周於蒲州東

南築永樂城置永樂郡 隋大業十三年翊衛

郭子和反自稱永樂王 唐代宗以永樂公主

妻田華 宋神宗時遣給事中徐禧護兵城永

樂 徽宗宣和二年睦州民方臘自號聖公建

元永樂 三輔黃圖云漢未央宮中有宣德殿

藝文類聚引漢宮殿名云長安有宣德門 南

齊鬱林王母號宣德太后 宋東京有宣德門

金天眷初改德州爲宣德州元改爲宣德府

今稱宣府

元世祖至元二十二年以宣德王好禮

並爲浙西宣慰使 泰定帝崩太子阿速吉八

即位於上都改元天順 西夏王乾順改元正

德

濯纓亭筆記卷四

濯纓亭筆記卷五

長洲戴冠章甫

成化間湖廣旱襄王欲得祈雨者或云黃州有人善此術王使召之其人與三人俱來入山徧求龍見一石上有青綠暈曰此有龍矣恨老乃以錐抉石上果有一穴久之穴漸大復以一竹筒探入穴口穴中水隨溢出須臾雲氣四合雷電交作風雨驟至其人以瓶罌負石穴中水入城雨方可五里許城中皆徧惜所及不廣其人

云某處有龍年少可多得雨王恐龍怒致水患
難制遂厚賜其人而遣之

吾蘇夏御史

璣

知大庾縣時歲旱邑人云大庾

嶺下有龍湫祈則有雨但山谷深險不可入昔
有主簿往祈以繩縋入雨驟至從者或溺死自
後人不敢入夏公從數人以往以索自縋下出
則令從者先登復以索援引而上其地有水洞
方可半里許水皆玄色沸湧流出溪澗古木大
可數抱蔽翳天日山箐深密幽僻可怖以器繞

水求龍但得一生物則龍至矣或蝦或魚或蜥蜴之類得則疾出仍以筆誌巖下一小石得雨後乃令人送龍至故處而取石以爲信否則人從中道棄龍不至故處後祈雨則龍不應矣夏公爲人誠篤龍出雨降送之一如故事云

張士誠據姑蘇日開賓賢館延納諸名士慕楊廉夫名欲致之不可得聞其往來崑山顧阿瑛家潛令人伺於道中強要之旣至適元主遣使以上尊酒賜士誠士誠設宴以饗使者廉夫與

馬即席賦詩云江南處處烽烟起海上年年御
酒來如此烽烟如此酒老夫懷抱幾時開士誠
得詩甚慙旣而廉夫辭去士誠亦不復留也

介馬默默百里程青楓後夜血書成祗應劉阮
桃花水不似巴陵漢水清此楊廉夫題臨海王
節婦詩也宋亡節婦被元兵虜至嵯縣青楓嶺
齧指血題詩石上投崖死廉夫責其不即死故
詩云云嘗聞故老言廉夫無子一夕夢一婦人
謂曰爾知所以無後乎曰不知婦人曰爾憶題

王節婦詩乎爾雖不能壞節婦之名而心則傷
於刻薄毀謗節義其罪至重故天絕爾後廉夫
旣寤大悔遂更作詩曰天荒地老妾隨兵天地
無情妾有情指血齧開霞嶠赤苔痕化作雪江
清願隨湘瑟聲中死不逐胡笳拍裏生三月子
規啼斷血秋風無淚寫哀銘視前詩予奪大不
相侔矣夢之有無不可知予考宋景濂作廉夫
墓銘有一子一孫則無後之說亦非也或別一
人爾夫士君子論事不當於無過中求有過節

婦被虜欲死而無便可乘追臨險而後行其志
既殺身以全節則他非所論矣廉夫之評誠過
刻哉

吏部尚書崔公恭妻極妬悍公無子置妾未嘗
得一顧顧則其妾必遭箠楚積十餘年妾亦無
妊僚佐皆爲之憂公無如之何後其妻病死僚
友不以弔而以賀知公之有子也踰年而公果
生子鄉使公先其妻而卒崔氏爲若敖之鬼無
疑也觀崔之事則世之懦夫制於妬婦而絕後

者多矣可不戒哉

鄧卿字志夔蜀人爲戶部主事妻甚悍戾嘗捶楚婢妾足指皆墮棄糞草中家人畚出棄道上鄰家兒以線繫足指曳竿上引鳴鳥爲西廠邏卒所執問所從得兒指示鄧處卒以聞詔下錦衣獄訊鞫具得其實卿坐削籍爲民

今世淫祠如觀音堂真武廟關王廟文昌祠之類皆愚夫細人所爲至於迎神賽會瀆禮不經之舉非但糜費民財亦姦盜所由起爲世道慮

者力加禁遏可也顧今之從政者於此等事多
闊略不省間有愚懦不學之徒誅於禍福之說
反從而助之故邪妄之習日新月盛可爲歎息
大抵建祠賽會必有首事之人乘時漁獵民財
宜痛懲以法沒其所歛之物于官以備賑濟之
用取土木之像投諸水火而以應祀神祇或名
宦鄉賢神位改奉於中以塞其妄源則譎張爲
幻之人知警畏而自息矣

天台陳公

選

督南畿學政凡學校中有文昌祠

像皆移檄郡縣撤毀之公去後有誦瀆以冀非望者稍稍復之長洲邑學有生徒復捨財塑像

莊嚴愈於昔後

其

病疽死亦竟無聞於科

目云

十二辰生肖莫知其義嘗聞人述浙江參政左公贊之言謂以足上趾爪奇耦辨辰數之奇偶或疑子肖鼠鼠足爪前耦後奇又何也予曰此可見取象極精蓋子乃陰極生陽又在夜半萬物皆息之時惟鼠獨動若陰中有陽靜中有動然故取象於此丑牛牛蹄分爲偶寅虎虎則五

爪爲奇卯兔兔則四爪爲偶自餘無不然獨已
肖蛇蛇固無足又何取義蓋已在月乃純陽之
月在時乃純陽之時數雖偶而時則陽故用蛇
以象之蛇乃陰物不用其足而象已著疑亦諱
言乎陰之意爾又易曰乾爲馬坤爲牛造化權
輿云馬之蹄圓牛之蹄折亦此義也

煮鹽者值久雨則鹵汁淡而不凝以皂莢少許
入鹵煎之則成鹽矣凡欲辨鹵味之高下者以
帶殼蓮子投之上鹵則蓮子浮在上中則在中

下則在下此亦物理之不可測者

諺云慈不掌兵義不主財又曰催科無善政此非有道者之言也以予論之不慈不可以掌兵不義不可以主財非善政不可以催科

林靈素以左道幸於徽宗其人固士君子所不齒然亦有可稱者如見元祐黨人碑則拜曰此皆三天門下仙吏也又爲詩曰蘇黃不作文章客童蔡翻爲社稷臣三十年來無定論不知姦黨是何人史言靈素每遇七日升座講說座下

皆宰執百官三衙親王中貴語多涉謔笑當時
必有如東方朔以詼諧諷諫之言但其君臣皆
昏庸不之省耳蓋方儉邪用事人既不敢正言
故靈素託此將以悟主也不然何以見惡於蔡
京奏其僭用尚方器物欲寘之法乎就使靈素
無此亦決非童蔡之黨也

越城題扇橋北王右軍宅今爲戒珠寺鑑湖亭
賀知章宅今爲千秋觀惟吳孜宅爲紹興郡學
時人有詩云右軍第作空王宅賀老家爲羽士

官惟有先生舊亭館春風還在杏壇中

故事每秋後於闕下錄囚公卿咸在一歲訊及
一劫盜盜抗聲曰若輩何必問吾吾爲貧故行
盜耳若輩位高祿厚非貧也罔不貪黷貨賄較
諸白晝劫奪者爲甚尚不知愧乎諸公無以應
事在成化間時新昌俞公欽爲禮部侍郎在列
嘗爲人言之此頗與岳氏程史中鄭廣詩類相
歸叔度崑山人洪武初避事挈妻子之蜀至某
州幕抵一民舍寓宿坐定一老翁負笠亦來翁

顧叔度曰子南來良苦叔度不答疑其爲邏者
踪跡至此意頗恐翁曰子無怖吾故此土民也
叔度始以入蜀告翁曰此去蜀甚遠况道非所
由子將焉往叔度顧妻子歎且泣翁曰姑就寢
明日吾爲子先導吾每十步束草爲識子行第
視所結草盡處問蕭公家吾其遲子矣即不吾
信達蜀無日也叔度俛首謝詰旦問翁則已行
矣遂趣妻子起就道果見束草皆不出十步外
視有草處行取道萬山中皆閭然幽絕之境然

路徑皆平坦不覺有跋涉之艱至察妻子亦無
憊容叔度心異之日未夕抵山下相與憇一巨
石回顧向所涉處巖險萃萃若天上而所結
草至是亦無有矣叔度自詫曰蕭公其神乎頃
之髣髴聞雞犬聲俯瞰石下見居民十數家趨
往就之民異其語言衣服皆驚問所自來語以
老翁先導之意且問孰爲蕭公家衆詰其狀貌
曰得非長身而荷笠者乎曰然衆賀曰公大有
福人此山峻絕且綿亘數百里所在皆叢篁鉤

棘人莫能至縱使木拔道通亦必旬餘乃可至
此安有不信宿能達者乎是誠神相也遂指一
小丘謂曰此即蕭公家矣叔度趨進見有廟巍
然入門像設儼如昨暮所見者叔度稽顙再拜
衆相率具雞黍留之數日各致餽遺而別別未
三日即抵成都矣叔度居成都二十餘年始還
鄉後年九十餘尚強力善飯每與人追叙舊事
輒欷歔泣下叔度爲人敦厚謹恪故得全於患
難如此

鄱陽李忠字仲彰洪武中爲會稽倉塘稅課大
使旣沒其子最年二十尚不識一丁字然頗有
志於學時劉西江孟熙王鑑止內敬鄭梯莊原
亨俱有文學盛名最數從之游每聞諸公談論
僅唯諾而已孟熙謂之曰而欲與吾輩游須讀
書乃可否則徒爲衆都養無益也最聞其言即
感奮讀小學語孟諸書繼以經史作爲詩辭漸
有可觀久之其藝遂與諸公頡頏當時士林稱
爲劉王鄭李自是遂留居越中初鑑止令夏某

爲最求婚於鍾氏旣納采最辭歸鄱陽將弼先業來畢事一去五年絕無音耗女氏以爲存亡難必又恐其有他議以至負約意欲別婚鑑止計無所出更爲擇婿得朱氏卜日成婚是日最來自鄱暫止錢清客邸假寐於榻目纔交睫若有人撼其首促之起者最起視日尚早即疾行抵媒氏家隔岸呼船以渡夏子見之奔告於父曰李生來矣其父出視之果最也即與俱詣鍾氏遂於是夕合卺相違於五年而成事於一旦

亦奇事也。最後定居山陰中澤里，學成行，尊越之大家，爭延致爲塾師。生三子，二女。鍾氏先卒，最悼之，以詩曰：「三千里外來，依日念爾都。」忘客裏貧，共喜有男，兼有女，那堪無族，更無親。秋燈促織，縫衣夜春，雨催耕，饁餉晨家業甫成身已歿，傷心忍覩舊時真。越人至今能道之。

海寧有婦人與所私者殺其夫，事覺，婦坐繫獄。母入，饋橐，婦使語所私者曰：「汝不能用計，出我，我亦終不置汝所私者。」乃市藥令潛內之。其藥

飲之可氣絕數日而復甦婦飲而死七日獄吏
驗而出之婦家買棺瘞於野所私者夜剖棺出
尸飲以天麻湯而甦負歸其家隣人聞婦已死
忽復見之奔告於官執婦就訊其謀畢露竟坐
極典所私者亦論死鄉令此婦獄未具而死於
囹圄則得全其要領而同謀者亦幸脫矣今以
詐出獄而兩皆不免殆鬼神使之然也予按太
平廣記載劉震之女無雙没入掖庭其姑子王
仙客使古押衙求茅山道士藥矯詔賜無雙死

三日贖屍救療得愈遂爲夫婦此藥蓋自昔有之矣

官府以木爲箸夾人手足指使之痛俗呼曰儼或作纂韻書有此字而非此義蓋杜撰也此必後世之淫刑耳今斷獄自有訊杖律文所載具有尺寸舍此而用淫刑仁者弗爲也或乃以此爲迂儒之言曰死獄不用重刑囚不款服嗚呼獨不觀中孚議獄緩死之戒乎緩者非謂囚不承服而遂舍之也但從容以求其隱曲耳若用

刑太酷而遽則誣服者衆其害可勝言哉緩死
一詞實聖人無窮之深意用刑之良法也司民
命者其可忽諸

唐書隱逸傳云陸龜蒙門有巨石乃遠祖績事
吳爲鬱林太守罷歸無裝舟輕不可越海取石
爲重人稱其廉號鬱林石吳人相傳婁門內水
涯巨石即是歲久埋沒土中未有表識之者弘
治丙辰巡按御史樊祉行部至吳始訪得之令
人曳至察院之側作亭覆之題曰廉石吳少宰

原博爲之記

蠶被蚊螫則繭中蛹成蛆蓋正氣一爲沴氣所
犯則正氣反爲所敗君子往往不能勝小人亦
於此可驗

仕宦者至京師賂遺津要或有厚薄津要之人
報之亦不同故京師語曰十兩銀到處尋一疋
段看一半一疋紗沒處查

輦轂之下民物繁衆而風俗之澆薄爲甚會城
大府亦然古者取士於田野筦子曰農之子恒

爲農野處而不昵其秀民之能爲士者必足賴
也人能力田務本置身山林之間非惟足以養
心畜德至其子孫亦自有朴雅之風爲學亦深
潛縝密與尋常市井人不同出而仕宦必多風
節清介之士立家業爲子孫謀者盍亦擇所處
哉

世傳鬼作詩云作

音佐

鬼今經幾十秋也無煩惱

也無愁諸公勸我爲人好只恐爲人不到頭莊
生所謂髑髏深曠處頰云吾安能棄南面王樂

而復爲人間之勞乎即此意也

古人多以方言爲詩如韓退之因吳音以作爲
佐故有方橋如此作之句白樂天因淮楚間以
十爲恍故其詩云紅闌三百九十橋顧况因閩
人呼子爲囡呼父爲郎罷遂戲作詞曰囡別郎
罷心摧血近時毘陵陸詹事廉伯翟通判舜民
用吳語作一詩云阿大音蘇州去反教渠音貴其
反豁豁音搖途中防音跋舌切沒買牢曹蓋南人
呼大爲憤彼爲渠快便爲豁豁莫爲沒防爲旁

又呼與人爭辯曰跋舌呼諸零雜之物曰牢曹
一詩四句純用吳語亦善謔也然作之音佐不
特吳音爲然史云廉范爲蜀郡太守民歌曰廉
叔度來何暮昔無襦今五袴不禁火民安作則
蜀亦然矣

吳俗語必有義最爲近古如謂無物可食曰無

害

仇池筆記江南人好以鮮脯膾炙埋飯下謂之盤遊飯食者以箸發之云掘得害子謂

杖痕曰虹

虹俗呼如絳亦古音也蓋虹有青紅之色與傷痕相類故云又呼虹爲蠶

蠶海中介蟲與虹義疎不近或云當爲托俗謂虹霓常見則五穀少收而歲多不稔如托預然

爾謂具酒殺賀人曰斨勸斨音披字書割肉也言割肉以勸酒也

謂與人共出錢置酒曰扛釀釀音詎字書飲錢飲酒也謂酒

之清者曰撤潢釀酒初熟於缸面掠取其清者飲之謂之撤潢潢去聲見范石

湖集又呼酒未蒸煮者謂拭案布曰幡布說文

拭觚布也又晉人云不見謂條頭索曰蘇頭蘇

酒家幡布乎用久則爛蘇蘇鬚古音通也今吳人呼人鬚亦曰蘇謂小

巷曰弄又城市中民居稠密處空一路通行曰

弄弒謂朴擊人曰鑿凡怒而欲擊之者輒云鑿渠一頓漢書鑿阜蘭下顏

師古註云鑿謂苦擊而多殺也今俗猶謂打擊之甚者曰鑿謂自誇曰賣弄

南史齊竟陵王子良啓以范雲爲郡齊主
曰聞其恒相賣弄義雖不同語亦有自
謂執
業治生者曰作生活
梁蕭宏愛錢積至三億餘
萬武帝見之曰阿六汝生
活大可

田家常種之地間歇不種以全其力謂之曰易
周禮地官云不易之地家百畝一易之地家二
百畝再易之地家三百畝鄭司農注云不易之
地歲種一易之地休一歲乃復種再易之地休
二歲乃復種今人所謂易地蓋本諸此

上虞縣有夏蓋湖竊意湖乃瀦水之地夏月旱

曠並湖之田資其灌溉當名夏漑訛爲蓋耳吾
蘇近閭門有水亦同此名郡志作夏駕謂吳王
夏月避暑駕遊於此故名

濯纓亭筆記卷五

濯纓亭筆記卷六

長洲戴冠章甫

吳人謂大風拔木發屋者曰風潮無雨者曰乾風潮凡風潮之作多在夏秋二季有風潮則無雷昔人謂陽在外陰在內陽不得入則周旋不舍而爲風陽在內陰在外陽不得出則陰陽擊搏而爲雷風潮無雷則此理信然矣

浙人蘇平蘇正兄弟皆能詩平號雪溪嘗作繡鞋詩有南陌踏青春有跡西廂步月夜無聲之

句其格致甚卑然當時以爲絕唱目爲蘇繡鞋
此正統景泰間事也去今四十餘年使平在今
日未能窺作者之門戶尚得負此重名邪以是
知世間事皆有倖致者豈特詩名然哉

成化間蘇州有一僧不知所從來自云終南山
人姓趙人以其善食肉呼爲吃肉和尚其狀極
類僧家所謂達磨者首戴一笠冬月僅御一衲
衣未嘗衣絮往來諸叢林雪夜坐廡下人往視
之見其髮上蒸蒸氣出每食肉盡數斤秣飯可

四五升惟不飲酒一飯則數日不食食必自炊
煮極精潔坐則以手入衣中握其陰作飯時則
以帶繫之扱腰間乙亥年冬至日死未死前一
夕謂一老嫗曰我明日歸也嫗謂其將還故鄉
耳詰旦起以木桶盛水飲之拜四方畢遂化亦
無他異云

或云茶毘時亦
得十數舍利

陰陽拘忌之說類不可信信之者往往廢時失
事君子亦盡人事之當爲順人力之可爲而已
在天之凶吉無容心焉可也或曰朝廷曆日有

年神方位則方向不可不擇逐日有宜某事不宜某事則日辰不可不擇矣予曰堯之曆象授時不過教人順天時以盡人事我高皇帝恐天下陰陽拘忌之說多岐作此以一愚民之心志使不爲術士所幻惑耳今自朝廷言之亦不盡信如郊天卜日必在正月上旬中旬祭先師必以二仲丁日不問其宜祭祀不宜也則日不必擇可見矣又累朝山陵復土皆不出五月豈有山頭利不利之語則方向不必擇可見矣此

事在世間最明白易見顧不能察而取信於術士邪妄之言何哉

江湖間脩真鍊藥之徒秘書口訣千蹊百徑皆有理足以動人雖高明之士猶爲所惑假使修鍊有此理則此輩亦神仙之流必能遠處山林逍遙物外豈苟就富貴之人而求利覓食哉吾鄉馬主事愈嘗遇方士勸其燒銀愈戲贈以詩曰破布衣衫破布裙逢人更說會燒銀君何不自燒銀用擔水河頭賣與人方士慙噤而去然

此詩本出徐氏涉世錄又俞琰席上腐談亦記之愈但易其後兩句耳

腐談云伊川先生遊僧寺得丹書於佛腹中後如其法鍊之既成而未即服劉孟熙霏雪錄則以爲明道先生事皆妄言也觀康節欲以數學相授二先生尚不肯學况丹書乎是特幻妄之徒藉口以自重其術爾

元時淮人趙氏富而好文嘗以詩賦私試士亦有狀元進士等第試畢設燕各贈金銀酒器以

名次爲差其家有明月樓以金壺及杯盤餉趙子昂求書春聯子昂題曰春風閣苑三千客明月揚州第一樓當時以爲絕唱夫趙氏以貨利誘士而士皆樂就其試又私爲等第而官不之禁元氏政令之弛士習之卑亦可見矣

趙子昂善書有文名元世祖聞而召見之子昂丰姿如玉照映左右世祖心異之以爲非人臣之相使脫冠而頭銳乃曰不過一俊書生耳遂命爲殿上春聯子昂題曰九天闔闔開宮殿萬

國衣冠拜冕旒又命書應門春聯曰日月光天
德山河壯帝居因出宋藝祖神像命之題贊以
觀其志子昂踧踖良久題曰玉帶緋袍色色新
一回展卷一傷神江南江北新疆土曾屬當年
舊主人世祖大稱善

袁凱字景文松江之華亭人洪武初爲監察御
史時高皇矯元政寬弛方用重典人不樂仕
凱稱疾佯狂歸家上疑其詐使人密覘之凱
豫戒家人用米粉和錫貫竹筒中出之狀類狗

矢夜令人分布於道凱著破帽敝衣行歌道上
掇取食之覘者以聞上始不疑凱用是得全
凱有文學能詩未仕時嘗謁楊廉夫廉夫作白
燕詩自以爲工凱讀之殊不首肯翼日自作詩
投廉夫云故國飄零事已非舊時王謝見應稀
月明漢水初無影雪滿梁園尚未歸柳絮池塘
香入夢梨花庭院冷侵衣趙家姊妹多相妬莫
向昭陽殿裏飛廉夫得之大稱賞一時呼袁白
燕云凱喜譔嘗賦虎詩及雷擊枯槐詞其指

皆有所諷刺鄉人至今傳之以辭俚不錄

長洲令劉輝湖南之孝感人嘗云其地有人行
山中絕糧無所求食至一家見人病癯誑之曰
我善治是疾所費麪一斗足矣癯人喜問其說
曰可爲餅百枚吾呪之則病去如其言其人每
持一餅拂癯呪曰癯也癯隨我過山嶺呪畢盡
持餅去踰嶺欲食之剖視其中如墨無一不然
其人心惡之棄諸礮中癯人果愈於乎彼以詐
求食而不得食此以誠求治而病卒愈是雖偶

然亦誠僞之所感召歟

毘陵王尚書俱在翰林時家人食鷄而骨留咽中醫莫能治疾亟或云城外有人能持呪治此者即往求之其人以水一盂置案上書一符焚之久之聞其盂鏗然作聲則骨已在水中矣病者在家覺咽中有物挺出計其時正持呪之頃也其人自云胡僧所傳竟莫曉其何術

今世祝壽者多畫壽星圖予嘗見宋人題識一通不著姓名其辭曰章聖皇帝踐阼之明年有

異人長纔三尺許身與首幾相半豐髯秀耳巧
食輦下人叩其所自來則言曰將益聖人壽一
日聞於上有旨召見內殿被聖問則復以前所
言爲對訊其能則曰性嗜酒命之飲一舉一石
宸眷方渥俄逸其人翌日太史奏壽星之躔密
聯帝座上益異之後令訪求不可得勅圖其像
云云

荆湘間諺曰三十里外不帶繖好大膽五十歲
後不買板好大膽言行三十里外則風雨不可

期五十歲後則生死不可期爾然人生兩間無時不可死豈特五十然哉又有常言曰出外十里爲風雨計出外百里爲寒暑計出外千里爲死生計其指與前語同

楊公繼宗山西陽城人成化間守嘉興剛正不阿愛民如子自蒞政不收夏稅歲以郡之餘米補其數後有憲司官王齊者嫉公名出已右知其用餘米補夏稅也欲据拾以爲過將聞於朝命吏取公補稅舊牘閱之方展視間牘忽聯翩

而起漸升於空有群鳥爭噪而攫之隨風破裂
飄散無遺見者無不稱異其事遂寢嗚呼公以
衍餘之財而寬民力齊以剋核之心而擠正人
天道昭灼如此彼欲違天害人者可以知警矣

楊公之爲浙江按察使也嘗語人曰衆人所畏
者我獨不畏衆人不畏者我獨畏之人問其說
公曰權豪勢要人所同畏而我不畏金銀人所
不畏而我畏之語雖粗激亦足見其所操執矣

弘治癸丑夏六月紹興郡不雨以故事迎龍於

郊外名山太守遣邑丞往用木桶盛三龍來以
布覆之闔郡官吏父老匍匐拜跪導以簫鼓儀
仗供於城隍祠中使羽流朝夕焚香諷經予詣
祠下求龍觀之羽流發覆以視乃一蜥蜴再發
一器曰線龍者乃一水蛭耳餘一器不復觀知
其皆此類也明日一龍死謬云飛去郡中果雨
自太守以下復送之郊外禮數甚虔郡人喑喑
以爲神於平昔韓退之感二鳥而賦蓋二鳥雖
微非僞也今三龍乃厲物而蒙敬禮如此又會

逢澍雨之適其僞得不敗亦云幸矣雖然世之
幸者豈特三龍哉

何宇新廣東新會人親沒廬墓致猛獸馴墓門
宇新病篤舁至家獸隨而入城已而其病少間
恐獸齧人因還墓所獸復隨往人皆異之宇新
後登鄉薦仕至光祿署丞

有提學山東者不欲言其姓名在官廣通餽謝
還家以甕盛銀若干與其妻瘞於室中一夕其
妻夢甕中銀化爲灰疑有異發而視之銀宛然

在未及瘞也是夕盜入其室盡取而去若發銀以待盜者造化之巧如此

林弘閩人爲嘉善令狠愎無狀嘗殺一家無罪者數人先是弘認都御史聰爲同族聰鼎貴吏莫敢詰其姦故得肆志爲惡後爲怨家所訴坐繫獄荷校日久髮盡禿卒受極刑於市其妻流落辱身於一伍伯嘗在弘左右者遂爲夫婦恃權要而虐民者亦可省矣

葉恩臨海人爲池州守常侮一教官教官撫其

不法事陳於朝恩坐謫戍後有子爲御史恩作詩戒之曰柔道元來是妙丹我因不服病多端從今說與兒曹道唾面還須待自乾詞雖鄙近然亦可謂有所懲而悲後患者矣

姓源珠璣一書江陰楊信民所著舛謬特甚如漢文帝武帝本劉氏而列於漢姓之下宋本微子啓封於宋以國爲姓乃列宋武帝宋徽宗不知武帝之宋本姓劉徽宗之宋本姓趙也如此類甚衆此等書豈足行世而泉坡抑菴二王公

爲之序二公皆翰林宿學曾不辨其妄信民嘗
爲文淵閣纂修官當時以文學推之其淺妄乃
爾孔子曰蓋有不知而作殆斯人歟

言不可容易發事不可容易處人不可容易交
財不可容易取牲不可容易殺訟不可容易舉
田不可容易買屋不可容易起官不可容易近
賓不可容易主婚不可容易求女不可容易許
業不可容易棄宅不可容易徙盜不可容易疑
人不可容易毀讒不可容易聽勢不可容易倚

欲處事之周詳當究心乎斯語右予暇日偶述
者書之以自省云

弘治七年五月十七日蘇州衛印無故熱如火
手不可近凡四日而止

予在紹興日庠士章材章槩言其家去海不數
里海上有山多龍湫歲旱則往求龍嘗有人得
三足鼈以盆盎盛之或在或亡蓋神物也予嘗
讀爾雅曰鼈三足爲能字書能囊來切山海經
曰從山多三足鼈道家有天地水府三官神像

像前塑一物如鼈而三足曰能俗傳龍將下吸水作雨能則先往水垢自淨諸蟲魚皆遁去蓋若龍之前驅云

京師諸公署俱不敢擊鼓爲節恐混於禁鼓之聲以避尊也獨寺觀考擊鍾鼓不避無君之教此亦其一端云

佛者黠虜爾中國之人從其教者報師之道無不盡心焉崇飾刹宇殫竭誠力所費動以萬計至一齋供之微必極虔潔吾孔子之道其有益

於世若布帛菽粟不可一日無爲之弟子者皆
富貴尊榮然其間不肖者往往因修建廟學而
侵牟以爲己利春秋釋奠雖先事展省亦纔具
文而已實則皆委之吏胥輩甚者牲酒瘠酸器
物窳敗不問也以若所爲其有愧於異端之徒
多矣毘陵謝子蘭嘗因四月八日浴佛會賦詩
曰銀盆香水紫金身膜拜殷勤總市民周孔豈
無初度日儒生誰爲薦溪蘋讀之亦可爲一嘔
也

建昌人上官杲能以呪語捕蛇又能呪蛇盤結作字以占人家凶吉出則以一囊負蛇於背長樂謝士元守建昌時虎近郭傷三人士元自率獵徒往捕之從以兵弩甚盛杲過見之曰捕一虎何輒張乃爾衆知其有術奔告於守守召問之杲曰但令衆人毋呼我姓名聽我指使虎易制耳乃令人束草然火先行戒毋伐金鼓既至其所虎方踞坐叢竹間目眈眈可畏杲被髮策杖而進虎不敢動乃令人伐竹開道以袖拂虎

虎垂首弭耳如畏然遂撫其領而乘之以行至郭外民夾道觀之將入城一人呼曰官先生騎虎來矣虎遂回嚙果足果呼獵徒曰可急刺虎救我衆遂叢稍刺虎殺之人問果何術果曰此玄壇法也蓋道家謂玄壇神能伏虎耳西京雜記言東海人黃公能制蛇御虎常佩赤金刀蓋自古有此術矣

沈江宜興人居周孝侯廟側入廟必致敬見神像剝落輒謹護之一夕夢神令其張口噓氣與

之江寤覺筋力異常遂能徒搏猛獸嘗運糧至
京師途中與漕卒爭道衆欲毆之江持小桅竿
一揮數十人皆披靡墮水衆莫敢近江居家常
牽犁墾田日可五畝雖健牛不能及

景泰間山東有一人日能行五百里泗水至布
政司三百五十里一晝夜能往返

永樂間毘陵胡尚書

淡

奉使訪張仙至蜀中遇

高僧白雲和尚臨別贈胡公素帛一端曰出峽
當有用公出峽果遇 皇后哀詔始信其能前

知也後 太宗召白雲至京師朝士皆敬禮之
獨歐陽主事不爲禮白雲呼之曰爾非永叔之
裔乎永叔嘗贈我以詩探囊出之果文忠手筆
也凡宋元度牒具在後竟卒於京師

天順初徵撫州儒士吳與弼至京師與弼以道
學自負待人頗簡倨有士人往謁與弼久不出
士人殊不堪作詩投几上而去其詞曰假不假
兮真不真巖巖氣象實難親何如東魯文章主
勉勉循循善誘人與弼見之大慙

卷六

濯纓亭筆記卷七

長洲戴冠章甫

杭州士人張天錫名能文詞嘗作鄭元和詩曰
鄭子一寒如此哉形容憔悴轉堪哀歌殘市上
蓮花落忘却天邊桂子開風雪有情隨瓦罐雨
雲無夢到陽臺君看身上衣千結總是風流換
得來按唐人小說汴國夫人傳鄭生者本宦族
子與妓李娃狎昵流落不歸後遂行丐於市俳
優往往以爲戲劇且傳會其名爲元和云故天

錫賦此

宣德初御史李立奉璽書清理軍伍蒞蘇常諸郡立旣刻薄而蘇郡倖張微者山西人尤酷暴專誣執民爲軍視產業親故貫籍姓名微有相涉則謂其人曰汝欲爲軍乎欲爲鬼乎有與辨者輒死杖下於是民率誣服求生無得脫者後爲怨家所訴逮繫京獄時蘇人成規爲御史惡其虐民痛杖之竟死獄中鼠啖其目睛人皆稱快有子流落於蘇目雙瞽行丐於市予及見之

道中人指之曰此張微子也同時常倅張宗璉獨不阿御史意遇有誣枉者必力爲辯理御史怒其異已數詬辱之宗璉憤鬱疽發背死比喪歸常民白衣冠送者數千人立祠於江陰之君山祀之楊文貞公爲記其事觀二張之始終則善惡之報昭然矣

劉孟熙霏雪錄記人作詩以翁仲爲仲翁好事者續其句以戲之曰翁仲何嘗作仲翁讀書端的欠夫工想君難入林翰院貶向通州作判通

永樂間有祭酒作詩用弓雕字或嘲之曰雕弓
元不是弓雕此等吟詩不致標嗟我亦堪爲酒
祭可憐無計達廷朝少嘗聞此二詩他日讀詩
林叢話云有在高州校文者見士子詞賦中押
來儀鳳凰主文戲作詩云考試到州高吾徒愧
冒叨來儀賦鳳凰素節咏羊羔騷客稱原屈貪
人嫉養養如何得元解歸去學潛陶觀此乃知
前二詩亦有所本也

胡祭酒儼云幼時聞諸伯父虞部府君曰蕉樓

畫角之曲有三弄乃曹子建所撰初弄曰爲君
難爲臣亦難難又難次弄曰創業難守成亦難
難又難三弄曰起家難保家亦難難又難今角
聲之鳴鳴者皆難字之曳聲也嘗聞早朝雞人
所唱詞曰日出卯照萬方光四表不知何作人
長洲趙禎汝吉由刑部貢外郎出爲袁州守諸
僚私廨皆嚮南獨推官廨嚮北汝吉爲改之作
門之日發地得碑石記當時作廨者有趙禎名
是雖偶然符合亦可見數之前定也

蘇之閭門北濠有顧姬者夢故夫曰我死不幸
昨夕已托生爲犬今在某家黑喙玉色者是也
明日姬令人往訪其家乳犬中一雛毛色如夢
囑其家曰慎毋以此犬與人稍長能自食乞我
養之後姬遂畜犬於家犬曉解人意行止隨姬
夜則登姬榻與同寢人問之姬亦不諱但云前
世事耳嘗聞頃年刑部有犬姦婦人而噬殺其
夫之獄前史所稱盤瓠狗國者殆不誣矣

本草云蝻蛆蚓二物異類同穴爲雌雄端午日

收取夫婦佩之令人相愛蓋物有非類而爲配
偶者如蛇與龜獾與猿鯨與鸛皆是也又如
驢父馬母而生曰騾驢父牛母而生曰駝驢
驢同處者忽生一物似鹿非鹿似驢非驢人不可得而名大
抵物之非類而合雖能成形質而不能恒生育
如花樹接換他木則卉實異常復以其實種之
則卉實如故造化自有一定不易之理不可亂
也

水東日記云四方人相譏謔多以土名土俗爲
標榜如南人曰蠻子西人曰豹子之類予嘗因
是考之如吳人曰鹽豆兒晉王武子食羊酪問
陸雲曰吳中何以敵此答曰千里蓴羹未下鹽
豉意者鹽豆之稱本於此又柳子作捕蛇者說
故廣西曰蛇蠻漳州有過癩之說泉州多癘疾
之人故閩人曰癩蠻五代史王建少無賴以屠
牛盜驢爲事建許州舞陽人今稱河南人爲偷
驢賊疑爲此故也唐高宗欲立武昭儀褚遂良

諫昭儀在簾中大言曰何不撲殺此獠獠音如
爪蠻夷之稱故謂山西人曰獠子梁州倉有大
鼠長三尺餘爲貓所嚙數百鼠反嚙貓故謂蜀
人曰老鼠其他必皆有緣起或一時之方言或
經史之故事不可盡知也

劉岌字凌雲四川涪州人景泰甲戌進士仕至
禮部尚書妻亡妾甚妬婢生子妾命僕棄之僕
抱兒棄城下入就妾索銀買棺適刑部一吏過
城下聞兒啼抱去其鄰人周帽兒見之僕出問

兒安在周以實告僕歸詒其妻曰兒死已焚之
爰自公署歸妾曰婢適生女不育棄之矣後爰
致仕還涪州有鄉人某爲行人出使歸過爰問
曰公有子乎爰曰未也曰公有子在已七歲何
謂無子爰驚問故某具以告爰曰君能令兒還
則劉之有後君賜也遂遣一僕賫百金從行人
詣京求贖兒至京則吏已役滿去或告曰吏尚
居崇文門外某巷中亟往出金贖兒吏妻愛兒
如已出哭而拒之行人勸諭再三乃從吏遂與

僕送兒至涪岌之親舊聞其事醵金爲會往迎之岌見兒抱持大慟或賦詩曰八旬老父江邊立七歲孩兒天上來顧天錫在刑部時與岌爲鄰爲予言之

弘治中有楊會者宣城人以星命之術遊公卿間吾蘇劉與清爲御史與會善時會鄉人貢元禮爲吏部郎中且暮有卿亞之除會私謂與清曰貢公今年最憂者十二月安望陞轉乎公試觀之冬十二月七日南京科道劾元禮彈文至

與清以告會曰必無可爲已而果外補又曰明年耿吏部殊不佳次當是葉戶部與清曰若然誰當代之會曰無如屠朝宗倪舜咨二公然倪終不能勝屠明年春耿果卒葉亦去位已而屠轉吏部倪轉南京吏部會言皆驗又倪公在禮部時方擇良家子備尚主選凡三人曰陳廣者永平富人子賂巨璫李廣爲輿援自謂必中選先是與清嘗稱會術於倪倪召會示以三人之命俾推之詒曰是皆習舉子業他日何如會指

首一人曰此僅有微祿然科目非所望也餘皆
平平耳倪笑曰是旦夕爲駙馬矣何謂云云會
曰是皆非貴命我不能曲辭遷就也明日入
內見 太皇太后垂簾自閱之皆不稱旨而
罷

京師太學前栢林寺有二生從僧假寓室僧云
室有怪不可居二生意僧謾語不之信笑曰我
儒者不畏怪遂携行李就室至夕二生對榻一
寐一寤寤者見七人貌正黑次第入室持寐者

兩股反覆不已至曉問之寐者曰但見黑人搖撼我其手如水明日謂僧曰庭中樹下必有物請發以驗之發地果得鍋釜七枚碎之其怪遂絕

露布者文心雕龍所謂露板不封布諸視聽是也於雨露之露初不相涉初學記引春秋佐期云文露布武露沉及宋均云甘露見布散者人尚武其說大謬

通鑑綱目漢章帝建初五年遣弛刑義從就班

超平西域王幼學集覽云義從西羌種名居湟中此說非也義從自奮而向義願從者猶今之自願軍前報效人耳集覽見漢書有湟中義從胡故誤以此爲羌名義從胡亦胡人歟附而願從征者非羌之本號也

至正三年余守越夏六月不雨率僚佐徧禱群望又不雨河流且竭歲將不登心甚憂之父老或進曰郡有楊道士者能以其術致雲雨請召試之余信道不篤又以百姓故設壇長春宮禮

致道士如父老言既而天果雨民獲免饑因作

歌以紀其實復以報道士云昭陽協洽紀歲曹

祀融司權要腰音赤條搏桑揚柰金流膏赤熒烜

赫氣鬱陶爍石焦土田莫薈暴疋奚益衆口磬

太守何憚徙市勞陵嶽音探穴掣靈鰲密雲不

雨屯西郊父老走白相呼號有物爲虐肆其饕

眈眈音隅目出頂坊音走行如風三尺高朱鬣

芒亞反鬣音鬣音鬣音騁趨音喬音虓音恢恢天罔孰敢撓

道士楊姓衆所褒音搯音帝音搯音鬼物死阬濠稽

願致之不敢諂

音叨慢也

方相導前列左操斲鷄巽

方醜桂醪玄弋

缺二字

賢曳雲稍急繕怒目礫髻

二音

髦八靈效職屬韃橐

音高

奎踔趨

音厥

張飛棘桃魁

其音

或刺

畢方適爾遭批拉戟撮熾火包耕父遠

囚女魃捐殲殪罔象掀魑

音虛

猱清泠神潢瀟

音沸

奔濤目察區陬神遐邀檄召五星銚雲璈秘章

宣奏絨重臠

普袍反囊張大貌

頃刻六合陰陽交枝間

少女風飈颺迅霆軒

披庚反

較

魯鄧反

聲伐礮飛電

列缺激九壑霈澤霑足滌煎熬神情駭

與駭同

睟

恍若醺離離禾黍絕芳蒿歲書大有聲惛惛太
守之責或可逃作歌以報慚綈袍右元紹興路
總管白野泰不華所作并書今碑刻在郡之長
春觀予愛其辭翰之美且泰公以忠死其詩尤
當傳也錄之如右

今世陰陽家以某日人死則於某日煞回以五
行相乘推其殃煞高下尺寸是日喪家當出外
避之俗云避煞然莫知其緣起予嘗見魏志明
帝幼女淑卒欲自送葬又欲幸許司空陳群諫

曰八歲下殤禮所不備況未暮月而爲制服云
云又聞車駕幸許將以避衰夫吉凶有命禍福
由人移走求安則亦無益所謂避衰即今俗云
避煞也其語所從來亦遠矣蓋其初特惡與死
者同居故出外避之而人遂傳會爲此說也

正德改元都下有王氏者家甚富聘孫氏女爲
子婦將婚子療疾死恐孫氏匿其聘財秘不發
喪詐令媒妁請期女家覺其詐陽許之至親迎
日王氏以其女僞作男子往迎婦女家亦令其

子僞作女子隨行成禮王氏意兩女共一室了
無他疑不意少女與少男相說而私成配偶矣
都下民俗成婚三日婿與婦同歸父母家孫氏
遂留王氏女於家不遣王氏方悟受其欺已無
及矣先聘其女之夫家訟于官兩家當各坐詐
罪親舊議以孫氏之女歸聘王氏女之夫家官
以律雖無此法而情則順也聽之一時盛傳以
爲奇事云

浙江藩司以文移申巡按御史書上旬日偶忘

初字御史駁問時餘姚謝瑩爲司中從事名多
智官召瑩問計瑩曰此易耳復申曰朝廷頒降
曆日止云一日二日並無初字故不敢書實非
脫漏御史無以罪也又吾鄉顧長史昌爲教官
時申文誤書百爲伯御史駁曰百是數目何以
作伯叔之伯昌報云竊覩大明寶鈔上印文曰
幾伯貫文用此伯字孟子曰或相什伯亦用此
伯字時王之制旣如此古經之文又如彼此必
字書通用也御史亦不能難二事甚相類瑩即

閻老于喬之祖父也

瓊山唐綰成化己丑進士爲江陰令廉而怒時
時越法有所縱舍御史怒其專擅劾爲故出罪
當謫戍綰無以自明奮怒引刀自刎而不殊時
武進令熊翀綰同年進士也聞之亟令善治金
創者往視之醫云可縫合其傷處而傳以藥踰
時目少瞬則生否則不可爲矣已而目瞬果不
死翀復令人代綰詣闕訟寃章下南京都察院
辯之事白綰得復官嘗怪喉管脆薄安能勝縫

紉線久必敗何以能聯屬醫云用藥煮過桑皮
絲柔韌不斷以繡鍼引而縫之與肉相入乃施
藥則自不潰敗故得愈也唐史安金藏剖心以
明皇嗣之反五藏皆出血流被地武后使醫
內五藏以桑皮線縫之傳以藥經宿始蘇則醫
之治法自古然矣

公羊傳眚晉大夫使與公盟注謂以目通旨曰
眚即今俗語所謂眼色也史記項梁將殺會稽
守殷通詐召籍入梁眴籍曰可行矣籍遂斬守

昀義與朕同又楚辭曰滿堂兮美人獨與予兮
目成樂府子夜歌云賣眼拂長袖含笑留上客
獨酌謠云眼語送杯嬌五代史韓建傳云天子
與宮人眼語皆此意也

國初吳中有沈以潛者世業醫讀書能詩與玄
墓寺僧萬峰善僧患痰疾久不瘥以潛屢製藥
療之以潛被薦入太醫院居京師一日僧命其
徒詣以潛家求療語其家人云而主今歸矣家
人以爲妄遣之去不可曰吾師未嘗妄語也夜

分以潛之僕果自京師歸云吾主奉使出京已至毘陵矣其徒即與沈之家人往迓焉告以故以潛遂不過家而詣師師問吾疾可起乎以潛曰但有治法必無瘥理師云遲子歸吾已不相見恨無以報德吾有地葬之當吉今爲子定穴耳明日偕至其地曰竺山從某至某亦不甚廣師指示之曰子欲自致富貴乎欲遺子孫乎以潛曰吾老矣願遺子孫師曰若然宜少退數步取石志之未幾師沒以潛竟用以葬其祖母後

若干年其諸孫布政杰諭德燾輩果相繼取科第爲顯官鄉人多能道其事者予謂師之術神矣然以潛初拜官千里至家過門不入而與一病僧會其平日存心之厚可知也斯所以獲福者則豈獨以區區葬地之故哉

吾蘇鄭謙叔將葬其父穿墓穴遇前人壙謙叔即止而掩之夜夢深衣幅巾者來拜謝意是壙中之靈也荻扁王氏治葬地亦遇壙堅不可破是夕夢人告云我蘇州城隍神廖同僉之墓也

慎勿發發則汝家受禍矣王氏不聽竟發而葬之葬後三日塚夜被發倒懸其尸於墓木莫知其由又不自警仍埋於故處不一月而其家延燎殆盡大抵穿土遇舊壙不問凶吉即當掩築此仁人之用心也兩家之事足爲後人鑒矣
弋陽汪鳳成化間爲南京刑部主事獄故多鼠夜則出齧重囚手足及耳目因爲桎梏所拘莫能禦惟呻吟號呼而已鳳命市四貓畜之獄中鼠患以息鳳四子僕俊偉佃俱登科俊偉同入

翰林又何尚書文淵嘗患獄鼠爲害令吏卒買
油然燈後其子喬新亦仕至尚書人以爲陰德
之報也

刑部主事長洲孫霖每巡視獄舍好筆楚重囚
至有死於杖下者囚聞其來多求自盡刑部郎
中金華潘琚亦然嘗訊囚廳事前血肉狼籍故
二人皆不得年且無後

尚書童公軒性寡合不妄取予居南京時家人
衣食或不給雖三原王公餽以米及白金亦不

受毘陵王尚書俱知其介不敢致餽值有持禮幣求文者因謂曰童公之文勝余余令人導汝往求之至則童公問其人曰汝自來乎抑有使之者乎其人以實對遂卻而不納其介如此雖若過中亦當世之所難也

陳太常師召莆田人性誠篤如愚初在翰林時考績當詣吏部而誤入戶部坐司務廳頃之司官至莫曉其故亦不敢問良久人漸集師召問曰諸公皆考滿乎衆知其誤乃曰此戶部也大

笑而出他事多類此

紫河車藥名出陝西鳳縣丹家云用聖石九兩
取水二斗烹鍊而成紫色者是已或乃以少婦
初產胞衣紫色者納藥其中名紫河車此大謬
妄蓋未嘗讀醫經本草而爲是言也世豈有污
穢之物可爲長生之藥乎方士誑誘貪愚之人
其說大抵類此

青瑣高議云韓文公之姪湘能開頃刻花因開
牡丹二朶其上有詩云雲橫秦嶺家何在雪擁

藍關馬不前後公以言佛骨事貶潮州途中遇
湘冒雪來曰憶花上之句乎公詢其地名即藍
關也遂足成其詩云云予考之湘乃韓公姪老
成之子公集中詩題亦云左遷至藍關示姪孫
湘湘後登長慶三年進士第非方外之流也凡
神仙幻化之說率多傳會以公嘗排斥釋老故
其徒之不逞者造言以譏之耳按公自貞元八
年舉進士至元和十四年爲刑部侍郎諫迎佛
骨時已二十八年藍關去京兆無二百里公仕

如此其久往來道路熟矣寧有不知其地名而
須問乎其謬妄亦不待辨而明矣

舊說鷓鴣吐雛不卵生兔口吐其子予按寇氏
本草衍義曰澧州官舍後有大木一株其上有
三四十巢日夕觀之既能交合兼有卵殼布地
其色碧豈得口中吐雛全未考尋可見聽者之
誤觀此則兔之生子恐亦無自口出之理

濯纓亭筆記卷七